

Sin via

Autor(en): **Pult, Chasper**

Objektyp: **Article**

Zeitschrift: **Annalas da la Societad Retorumantscha**

Band (Jahr): **108 (1995)**

PDF erstellt am: **26.09.2024**

Persistenter Link: <https://doi.org/10.5169/seals-236091>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

SIN VIA

da Chasper Pult, parsura LR

La nova pagina rumantscha quotidiana, integrada en il Bündner Tagblatt da sonda, ils 22-10-1994, ha accordà a la Lia rumantscha trais clav d'aur. La raschun ha num: *"La SCUNTRADA an Val Schons era pigls organisatours scu er pigl pievel rumantsch en grond success. La LR ò organiso Workshops, referats, discussiuns da podium scu er otras occurrenz. Tgera Lia Rumantscha; ia m'alegr sen la proxima SCUNTRADA, dei igl capricorn."*

SCUNTRADA 1994 VAL SCHONS

Senz'auter è la SCUNTRADA en Val Schons stada l'eveniment il pli impurtant da quest onn passà. Reunir la Rumantschia e discutir cuminaivlamain è sa mussà er en la quarta SCUNTRADA dapi 1985 sco occurrenza fitg impurtanta per la Rumantschia.

La SCUNTRADA da quest onn è stada caracterisada dals sequents aspects:

- Il discurs programmatic dal secretari Bernard Cathomas e las occurrenz sut il titel "Strategias per damaun" han dà l'ensaina da l'engaschament politic cultural a questa SCUNTRADA.
- La giuventetgna è sa participada durant l'emna ed ad in concert da rock istoric la sonda saira en in dumber considerabel, quai che mussa l'interess e l'engaschament.
- Ils radios e la televisiun rumantscha han pussibilità ina participaziun indirecta da la Rumantschia a la SCUNTRADA er senza far la via fin enta Schons. L'eco da la SCUNTRADA è stà considerabel.
- Last but not least ha la vallada da Schons pudì sentir ina fladada rumantscha ed è forsa sa sentida main isolada dal rest da la Rumantschia per in'emna; e las Rumantschas/ils Rumantschs da tut il Grischun han emprendì a conuscher la bella Val Schons e l'ospitalità e cordialità da lur abitantas ed abitants.

75 onns Lia rumantscha

La Lia rumantscha ha pudì festivar ses 75avel anniversari durant quest onn. Cun ina occurrenza durant la SCUNTRADA ha in vast public pudì sa regurdar u s'infurmar en ina nova furma da l'istorgia da questa organizaziun. La Lia rumantscha ha fatg tras in grond svilup en quests decennis ed è in spivel interessant da l'istorgia politica, economica, sociala e culturala dal Grischun. Il giubileum è stà sut l'ensaina da novs tschentaments, acceptads da la radunanza da delegadas e delegads da la stad. Quests tschentaments en moderns, correspundan a las pretensiuns d'ozendi e cuntengan en moda explicita la cumpetenzza da la Lia rumantscha da

s'engaschar sin tut ils secturs da lavur sco ella fa quai dapi lung temp. "S'occupar cun tutt'as dumondas da la politica da linguatg en il vast senn e defender ils interess da la Rumantschia" (art. 3, cif. 3) - quai è la nova basa per ina veglia lavur.

Blera pazienza pretendan ils temas che Cicero numnass sut "ceterum censeo": Las tentativas da stgaffir ina gasetta dal di e la revisiun da l'artitgel 116 en la constituziun federala. Las lavurs cuntinueschan pli plaun che previs. Ma sch'ins avess vulì resignar, sche fiss quai stà pussaivel bleras giadas en ils 75 onns LR, ed era nus avain la speranza ch'ìls dus temas vegnan discussiunads vinavant era en l'avegnir e chattian finalmain ina buna fin.

La lavur da la Lia rumantscha è caracterisada sco ils auters onns da l'engaschament da tut il persunal en Chasa rumantscha sut la direcziun da Bernard Cathomas e vegn prestada a moda professiunala. A tut las collavuraturas ed a tut ils collavuratur vulesch jau engraziar per l'identificaziun cun la chaussa rumantscha ch'els mussan di per di e che garantescha la credibladad d'ina instituziun che stat en il center da l'interess da las Rumantschas e dals Rumantschs e da la publicitad.

Eleccziuns

Cun la fin da quest onn è ida a fin la durada d'uffizi dal consuprastant Giusep Capaul che ha contribuì durant tut ils 9 onns a formular la lavur da la LR ed a surprendre responsabladad. Era Jon Domenic Parolini banduna la suprastanza suenter in emprim trienni, perquai ch'el è vegnì elegì nov collavuratur regiunal da la Lia rumantscha per l'Engiadina. Cun Jon Domenic Parolini e cun Romedi Arquint, anteriur president da la LR, èn ils dus novs collavuratur regiunals duas persunas ch'enconuschan la LR fitg bain e che vegnan a prestar buna lavur decentralisada per metter ils postulats en bratscha.

Terminain cun dus trais patratgs or dal pled final da la SCUNTRADA en Val Schons:

Tuns e suns, vuschs e punts pudess esser stà il motto da la SCUNTRADA - vesì en retrospectiva.

Tuns e suns, vuschs e punts

- Ils **TUNS** da chanuns da la batteria d'artigliaria da la scola da recruts dal Monteceneri n'han betg ans fatg perder il senn per la realitad sco er la serp da la via naziunala 13, la quala taglia permez la Val Schons.
- Ils **SUNS** musicals differents durant quest'emna mussan la variaziun culturala dals Rumantschs dal musical Püntcrap, dal Cor maschado da Donat e conturn fin al festival da las gruppas da rock rumantschas.
- Bleras **VUSCHS** han pudì vegnir a pled, savens era per dir che nus Rumantschas e Rumantschs n'hajan betg ina vusch sufficienta vers noss vischins grischuns e svizzers, ma er na tranter nus.

- E las **PUNTS** - dissegnadas dals scolars da Schons sin ils bindels en la tenda da festa - èn forsa il simbol da retegnair la SCUNTRADA. Na punts da crap, ma punts umanas che nus vulain crear tranter nus. Per l'emprima giada en l'istorgia da la Rumantschia avain nus ina generaziun giuvna che ha stgaffi las PUNTS sur las regiuns ora, la quala senta dad avair in'identitad rumantscha grischuna (betg anc identitad rumantsch-grischuna, ma tgi sa quant ditg ch'i cuzza anc fin che quest vocal n'ha betg pli da far la differenza!).

Mettain en moviment tuts ensemen quai che nus vulain e quai che nus stuvain metter en moviment. Abraham Gustin, pur a Donat, cun ina fatscha che mussa tut ils tratgs dad ina existenza purila che decida anc senza sur l'adiever dal temp, ha detg a mai cun tutta loschezza: "*La SCUNTRADA â purto blear*". - Sche la SCUNTRADA ha purtà bler er a nus tuts, alura è ella stada necessaria.

A la fin da la preschentaziun dals 75 onns LR avain nus tedlà sco Tania e Curo da Vargistagn, in dals cumins da la Muntogna cun 45 abitants dals quals 14 èn anc uffants pitschens, han detg cun tutta natiralezza: "*jou bagliaf bugent rumàntsch*".

Questa fin dals giuvens uffants da Schons ans dat il curaschi necessari da prender per mauns vinavant ils problems ed jau vuless engraziar a tut quels che s'engaschan en ina moda u l'otra per il rumantsch e sia cultura.